

Recurso nº 115/2018**Resolución nº 103/2018****RESOLUCIÓN DO TRIBUNAL ADMINISTRATIVO DE CONTRATACIÓN
PÚBLICA DA COMUNIDADE AUTÓNOMA DE GALICIA**

En Santiago de Compostela, a 13 de novembro de 2018.

VISTO o recurso especial en materia de contratación interposto por J.R.L.R., actuando en nome e representación de RAMÓN LOIS, S.L. contra o acordo de adxudicación, polo Concello de Portas (Pontevedra), da contratación dunha subministración dun vehículo tractor novo con dous aperos desbrozadoras, expediente 452/2018, o Tribunal Administrativo de Contratación Pública da Comunidade Autónoma de Galicia (TACGal, en adelante) en sesión celebrada no día da data, adoptou, por unanimidade, a seguinte Resolución:

ANTECEDENTES DE FEITO

Primeiro.- Polo Concello de Portas convocouse a licitación para a subministración dun vehículo tractor novo con dous aperos desbrozadoras, expediente 452/2018, cun valor estimado declarado de 85.000 euros. Tal licitación foi obxecto de publicación na Plataforma de Contratación do Sector Público o 10.09.2018 .

Segundo.- Segundo o expediente da licitación, a mesma estivo sometida á Lei 9/2017, do 8 de novembro, de Contratos do Sector Público (LCSP en adelante).

Terceiro.- O recurso presentouse por sede electrónica da Xunta de Galicia o 06.11.2018 contra a adxudicación da citada subministración, que se publicou na Plataforma o 11.10.2018.

Cuarto.- Con data 06.11.2018 reclamouse ao Concello de Portas o expediente e o informe ao que se refire o artigo 56.2 da Lei 9/2017, de 8 de novembro, de contratos do sector público (en diante, LCSP). A documentación foi recibida neste Tribunal o día 12.11.2018.

Quinto.- Respecto da suspensión cautelar solicitada, non foi necesario adoptar decisión sobre a mesma porque xa se pasa a resolver o recurso en si mesmo.

FUNDAMENTOS DE DEREITO

Primeiro.- Ao abeiro do artigo 35 bis. 5 da Lei 14/2013, de 26 de decembro, de racionalización do sector público autonómico, corresponde a este Tribunal a competencia para resolver este recurso.

Segundo.- O presente recurso tramitouse conforme os artigos 44 a 60 da Lei 9/2017, de 8 de novembro, de contratos do sector público, e, no que fose de aplicación, polo Regulamento dos procedementos especiais de revisión de decisións en materia contractual, aprobado polo Real Decreto 814/2015, de 11 de setembro.

Terceiro.- No exame do expediente recibido, este Tribunal apreciou que existe no prego de cláusulas administrativas particulares un apartado cuarto denominado *“Orzamento base de licitación e valor estimado do contrato”*, onde establece que o valor estimado do contrato ascende á contía de 85.000 euros, o que tamén aparece no anuncio da contratación.

Dado que este contrato de subministración ten tal valor estimado declarado de 85.000 euros, como acabamos de mencionar, segundo o previsto no artigo 44.1 a) LCSP non cabe recurso especial por non acadar o limiar susceptible de recurso, de 100.000 euros, polo que procede declarar a inadmisión do recurso, sen necesidade de entrar noutros aspectos.

Así, o artigo 55 LCSP establece que o órgano encargado de resolver o recurso, tras a reclamación e exame do expediente administrativo, poderá declarar a súa inadmisión cando constar de modo inequívoco e manifesto calquera dos supostos dese precepto, entre os cales, na letra c) está o de *“A interposición do recurso contra actos non susceptibles de impugnación, de conformidade co disposto no artigo 44”*.

A maiores, o informe do órgano de contratación sinala que en ningún momento se lle notificou tal acto ao recorrente dado que non era parte no procedemento ao non presentarse ao mesmo, polo que aporta outras causas que poderían impedir o acceso ao recurso especial contra adxudicación como é que non fora licitador nese procedemento. Tamén alude a un exceso do prazo de 15 días para o recurso especial dende que se publicou tal acto na Plataforma, sobre todo o cal non é necesario xa entrar unha vez detectado que esta contratación non acada o limiar do art. 44.1 a) LCSP.

En todo caso, en virtude do previsto no artigo 115.2 da Lei 39/2015, do 1 de outubro, do procedemento administrativo común das administracións públicas procede remitir o escrito de recurso ao órgano de contratación ao obxecto de que proceda, no seu caso, á súa tramitación como recurso administrativo, de acordo co previsto no Capítulo II do Título V desa Lei.

Por todo o anterior, vistos os preceptos legais de aplicación, este Tribunal, en sesión celebrada no día da data, **RESOLVE:**

1. **Inadmitir** o recurso interposto por RAMÓN LOIS, S.L. contra o acordo de adxudicación, polo Concello de Portas (Pontevedra), da contratación dunha subministración dun vehículo tractor novo con dous aperos desbrozadoras, expediente 452/2018,

2. Remitir o escrito de recurso ao órgano de contratación co obxecto de que proceda, no seu caso, á súa tramitación como recurso administrativo, de acordo co previsto no Capítulo II do Título V da Lei 39/2015.

3. Declarar que non se aprecia temeridade ou mala fe na interposición do recurso, polo que non procede a imposición da multa prevista no artigo 58.2 LCSP.

Esta resolución, directamente executiva no seus propios termos, é definitiva na vía administrativa e contra a mesma cabe interpoñer recurso perante a Sala do contencioso-administrativo del Tribunal Superior de Xustiza de Galicia, no prazo de dous meses, a contar desde o día seguinte á notificación desta resolución, de

conformidade co disposto nos artigos 10.1.k) e 46.1 de la Lei 29/1998, de 13 de xullo, reguladora da xurisdición contencioso-administrativa.